

四庫全書

集部

欽定四庫全書

集部

性善堂稿卷一至三

詳校官庶吉士臣翁樹培
主事臣呂雲棟覆勘

謄錄貢生臣章松雲

謄錄貢生臣湯達泰

欽定四庫全書

集部四

提要

性善堂稿十五卷

別集類三 宋

臣等謹案性善堂稿十五卷宋度正撰正有周子年譜已著錄宋史本傳載正有性善堂集而不著卷數趙希弁讀書附志始列其目凡十五卷曹彥約為之序自明以來世久失傳今從永樂大典中採撮裒次以類排纂仍

析為十五卷以還其舊正游于朱子之門文章質實大都原本經濟不為流連光景之語其條奏便民諸疏不下萬餘言指陳利弊明晰剴切亦可謂留心世務不徒為性命空談詩品雖不甚高而詞意暢達頗與朱子格律相近觀其書易學啟蒙後書晦菴所釋西銘後跋申請釋奠禮諸篇悉於師說篤信不疑宜其亦步亦趨矣魏了翁朱子語類序稱輔

漢卿授以所集朱子語言文字度周卿從予
乞本刊諸青衣因屬其以學者之病著于篇
端云云是正又嘗梓行語類且為之序而集
中無此文又史稱正官太常時適太廟災為
二說以獻其一用朱子之議其一則因宋朝
廟制而參以朱子之說本傳中具載其畧集
中亦無此文蓋刪汰編纂之餘固不免有所
缺佚也乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

性善堂稿卷一

宋 度正 撰

五言古詩

次韻安撫侍郎勸耕喜雨之什

田家何所樂所樂日未曛男耕而禾稼女桑而襦裙面
垢落既塗目眩濕新熏婦子餚南畝詩人嘗云云使車
出東郊好雨清塵氣會集諸父老申之以儉勤父老歌
且舞未飲意已醺峩峩欲傾欹眊眊聳聽聞扶攜兩階

上歛灑泛十分丁寧付訓詞歸詔爾仍雲或笑言唯唯
或喜氣氤氳俯首側玄冠駢肩望朱幘通宵得膏澤綠
波漲河漬輕風扇微和草木亦欣欣正也何其幸連年
與禮文念昔在農畝備嘗辛與輦竭來充邑官簿書困
紛紛書生適我願端賴賢使君人苟得所依何畏乎織
紋感知無以報茅塞當深耘

青松一首送楊侍郎丈赴闕

東山種青松西山種榦木三年已成林十載盤空谷榦

成供烹爨松成架巨屋所用各兩塗成功異遲速早作
起攬袂庖人已炊玉盈車載束薪軋軋鳴車轂萬家爭
欲買須臾無一束樵夫喜易售不知山已禿朝夕手不
停采采嘗不足人情貴適用那復問榮辱落落青松子
歲寒抱孤獨大可充棟梁小亦宜桁樑奈何人不顧偃
蹇傲芻牧牽補芘風雨無復思營築有如命名公往欲
尋洛卜首當開明堂號令於此肅明堂禮有制併圖載
簡牘殷人崇以三周制加其六廣袤度尤嚴所冀容羣

服奉璋列左右天顏中穆穆規恢既宏遠制作難逼促
當資合抱幹一柱扶天軸切勿用小材小材必傾覆操
斤走宇內濯濯無遺育堅剛老不枯允哉東山麓愍懃
謝匠氏所望一留目勿謂道里遠登載容萬犧君王顧
之歎巨用必收錄脩竹操亦奇謹母遺脩竹

正同諸丈餞別制幹郎中

春風來戶牖春雨過庭隅攬袂送征車去去不須臾借
問何人斯玉立美且姝慶厯丞相孫太學學為儒一日

上震怒大姦伏其辜議者不深計但惟和是圖直欲函
其首而往獻匈奴君言國大柄不過賞與誅況此非常
刑何言歸之歟日月天之經山河地之樞綱維在名分
臣子當力扶大義儻一失自今難枝吾此事如君家曾
老姑之夫又如和議初編修澹齋胡精誠貫金石勇氣
激頑懦北庭聞此言何敢更凶愚公卿顧之嘆識者空
嗟吁有如此英才一第豈足汙便當司獻納朝夕贊廟
謨奈何遺之外沈浮在江湖應聘入賓筵萬里來成都

我昔聞其名英聲震八區今幸見其面堂堂六尺軀胷
中浩無際萬卷儲經郛開口論世事不許亦不諛況茲
當才難所懷真所須奉檄過西鄙敢憚歷崎嶇西州號
陸海劖外頗焦枯男耕飢不粟女蠶寒不襦連年雖豐
登今其庶矣乎撫摩勸薄斂勞來先蠲逋疾苦得上聞
歡聲沸道塗塞棠韓信溪去就想不拘徘徊蕭何堰萬
斛收賦租釀酒李固墓九原儻可呼再拜武侯祠武侯
伊呂徒事業雖不就千載懸規摹一力扶漢鼎初若甚

區區北震于曹魏東連于孫吳馴致河洛間南望攜簾
壺傳記尚可考遺迹應未蕪曩聞張忠獻初官斂版趨
慙懃嚴先生贈言良非迂具云今漢中二士山澤癯引
之與為友道義相涵濡以此忠獻公德業日敷腴駕言
過漢中願毋疾其驅世固不乏士安知今也無邂逅或
相遇提攜與之俱引領星橋邊雲間望歸鳥按此首押
二區字

送新四川茶馬

慶元二年春有詔來自東曰東川漕臣憂國盡變通東

川十五郡連年歲不豐國計僅以足民力幾窮空賴茲
經綸手調護遂奏功曰維權牧司有言驚聖聰咨爾予
漕臣僉言爾惟忠往哉其撫事惟和惟其中蜀人聞天
書喜氣如春風竊思斟酌權大概不可窮在昔元祐間
委付失狂童苞苴肆分行錐刀到心胷小蘇抗章論大
蘇以詩攻至今百世下得失爛如烘明公永霜姿材業
尤雄雄剝割一指間妙用付天工鳥獸雖無知好惡人
則同覲德自來馴遇暴輒興戎從茲三邊人稽首不敢

免蜀人願公留天子將思公謂公曰還歸其以來年冬
送王中父制幹東歸探韻得限字分韻用離別

不堪無限意艱危深仗濟時才

漢使東南來幕府皆異產英英江左家浩浩富編簡幾
年翔學海屢薦升士版大焉合訏謨小亦堪論譏橫身
借前箸逸氣薄雲棧向雖稔聲名曾未陪笑莞邂逅解
白眉軒豁蒙青眼俊遊得從容微辭略往返扁舟賦歸
程駿馬馳平坂上策今安在時髦貴謹柬中規儻前定

外患豈足刻善保千金軀欲語意無限

送張伯修省幹歸省重慶府一首

我昔赴集英涪陵見尊公尊公一世豪一飲能千鍾君
時年尚少已有尊公風舉動如成人吐語非凡童別去
已十載一牋不得通憂患催我老飄流寄西東逐食來
益昌執經司學宮故人昂昂來天涯復相逢憐我久憔
悴訪我寂寞中相從不知極春去秋復冬慈親促歸輶
歸步留無從入則孝與悌出則信與忠君看語孟篇問

學何終窮寸陰如隙駒大道如冥鴻重來定何時願言
加新功

送唐寺丞丈解郡紱東歸一首

并序

正區區之私重念百年幾見之義自欲追攀轍迹一
走境上偶聞簡書之責謹賦小詩姑致依戀之敬伏
幸笑覽

北溟有脩鱗其大無匹儔化而為羽翼頃刻徧九州天
地吾一體日月吾雙眸一飲萬斛泉一飯萬頭牛藏修

丘壑間昂昂亦無求塵寰何迫隘飛鳴不自由鰥嫗及
蛙黾孤豚及青鮑紛紛如蝟毛乘時恣喧啾其耳若不
聞其聲轉清幽其貌甚閒暇其心亦休休長思日月明
四天雲霧收東至于蓬萊西至于崑丘北至于窮髮南
至于不周宇宙渺一視去息無拘留我欲效鶴雛鳴和
聲相酬終焉附其翼一旦凌空遊使彼毛羽蟲垂頭自
懷羞此心如白璧秋陽照江流

奉別劉思中

憶昨我初往斗杓正南陬陽氣已汗漫伏陰纔如勾既
見御史公文書煩校讎時時延上坐不聽毀者謀公兄
東溪老博我詩之幽軒然肯相顧妙語吐如流諸郎永
雪姿學問誰朋儕其長遇我厚久要何綢繆感知不忍
去坐閱四月周寒暑無停機忽忽今已秋我學曾幾何
我懷良獨憂親庭催我歸歲晏無寒不朋友催我歸仁
義相講求山林本其性麋鹿本其遊再拜謝所知去去
母苦留

奉別唐寺丞丈一首

正家巴山陽占田纔百畝春秋自耕稼亦足餬其口中
年或水旱采蕨充飯糗四壁固屢空滿屋貯蝌蚪少蒙
義方訓交口相傳授日記數百言勇氣摩星斗既長遊
鄉校稍稍別妍醜父曰爾勉哉學問貴悠久雙然銘諸
內庶幾造淵藪奈何天降割繫累若孤狗三年抱憂患
忍復言進取洪惟太上皇下詔羅瓊玖提筆入貢士肝
肺始一嘔時年二十四一得殆天偶自茲青衫縛連年

事奔走得官涪江上距家纔百九

家至遂寧一百九十里

一年一

歸安親族相聚首留連輒數月官長怒訶吼三書下下

考薦者一邱叟

宋卿

浩然賦歸歟忽復失箕箒獨身當門

閫内外事紛糾母曰母自棄一出庸可咎迺趨光範門

所志在升斗是時京宰相來者無不受殷勤獻三策風

化略開剖明日益昌學有旨除度某於焉具菽水聊以

慰其母維南有真儒奮起光前後六月冒隆暑願聞道

樞紐一見晉其門妙語得親手歸來歡有餘俯仰對穹

厚益昌異風土日夕漲塵垢母也樂其樂雅欲安戶牖
版輿不可致徒使我心愀時時遣家僮歷歷問安否具
言唐益昌盛德世希有愛我如骨肉誨我如師友要我
以名節期我以不朽母曰爾得此敬哉不可苟努力勤
王事母為利祿誘儻有分寸補何必侍左右因循不敢
歸春風再花柳正也鮮兄弟子職寧不負奉檄得初心
一舸春江濶區區敢有請兵厨乞尊酒我欲徑持歸升

堂薦眉壽

校書西衙枕上呈劉原朝

夜雨不肯曉擁衾獨長嘆借問嘆何為嘿嘿終無言迴
風起相薄萬物無歡顏我心如古人作詩歌歲寒

昨蒙謂卿機宜學士佳章寵寄謹依元韻酬謝

乞幸笑覽

君家謫仙人豪俠好罵譏脫韁辱權幸捧硯誇寵妃風
月三千首百卉弄春暉恭惟紫微公執筆贊萬幾大行
或差舛考驗在璿璣同時三君子日月爭光輝我生百

年後覽之神奮飛粵從志學來斯文力發揮瓦劄帶塵

壞

歐公硯譜特取瓦硯謂胥吏筆以瓦劄研墨作字尤快

羊毛

筆之最下者

拂煙霏言

詞雖不工往往造精微邂逅逢名世如何尚布衣為我
持傾倒我心亦依依從今願卜隣窮空不思歸厚意敢

虛辱三尺橫金徽

寄襄陽楊侍郎三丈

茫茫天地間萬象森紛羅迺眷蜀三川神氣尤雄豪一
川發于岷一川分於洮一川啓母來其名為江沱洮江

得三陳經綸參夔皋協心裨興運廟社遺勲勞岷江得
兩蘇議論丘與軒只今元祐碑輝華萬丈高沱江當其
中瀰漫而委佗中興得五楊其三真英髦綿州號魁磊
射策登巍科嘉謨游入告旋進旋蹉跎南部最逸才氣
欲星斗摩遺墨數千言往往皆離騷惜哉天下士中道
迷山阿三丈寬宇量中立而不它事業照錦屏文章爛
岷峨縮手不近前三年淹禮曹飄然念鄉舍屢乞分旌
旄天子勉從之出鎮姑養疴荆南古都會十萬雄干戈

閉閣閱詩書人物如春和襄陽控敵衝鐵騎連兩河撫之以仁義敵人不敢過如聞九天上屢欲書歸禾生人政雲霓如何久婆娑一嘿了萬事明哲中自韜造次顛沛間超然完所操縉紳豈不願廣廈陪賡歌吹嘘元氣回彙征如拔茅正生沱江濱飲啄同一波辛勤事學問如琢磨切磋大不遺泰山小不遺秋毫古今靡不該上下靡不包動靜極根源萬物無所逃中心如金石固折亦已多常憂辱此江而為江神呵行李彌域中皇皇莫

一遭扁舟復東來欲見空神交引領寫眉膽清風送洪
濤

壽章漕

蒼蒼閩山高悠悠閩水清厥初萃瑰琦而世生豪英恭
惟皇慶歷當天開文明風雲千載會羅列皆名卿當時
郇國公致身為阿衡勲德著廟社雲仍爛瑤瓊迨茲中
興來接武扶炎精先烈益以震煌煌照天京藍田得佳
種歷世勤鋤耕莊苒歲月久斗杓符南撐得此希代寶

異奏如龍韻堂堂粹德容度量何恢宏俾之典風憲官
邪當震驚俾之職獻納國論當丕平俾之領樞柄邊疆
當不兵俾之坐廟堂帝業當盈成翻懷千里綬尺澤揚
修名皇慈有遠聽褒章卑一旌驅車振末俗雅意先文
盟賤子偶在泮錫朋賦義菁佳節慶親逢黃流酌金觥
願公接皋夔願公齊喬彭百年起世德一旦收家聲從
容趨玉陛懷哉一儒生

賦張袁州隱齋三首

齊王非愛牛厲人非愛子秉彝未殄滅生意不可已儻能克其端萬物均一體胡為隔形骸强自分彼此達人有大觀俯仰盡天理從渠美與惡不與我愠喜敬問何以然請先事克已

少時見敲榜濺濺背欲汙及壯事州縣稍稍覺不憚由來祇一心今昔非異見君子遠庖厨夫豈惡芻豢長恐惡念熟此道出無間是隱乃在我扁牋安用辦君侯退歸來此意却無限

殺魔無戚容活蟻有德色不如未見蟻生道猶不息心
如隔窗月光不見微隙不患無發時却患發無益一矜
障萬善千悔無一得要加持養功跬步見天則宇宙渺
無窮此道足充塞

八月中澣同官會于塵外亭分韻得煙字

放步超闌闈濯纓俯漪漣清風來徐徐玉宇明娟娟平
疇卷黃雲遠浦凝寒煙橫空六六峯一一來當筵秋光
助顏色相對如高賢三義眇遐思髮鬚窺其顛悠悠城

南道鬱鬱惠陵阡懷哉千載人喬木今參天回頭子雲
宅池塘亦依然奈何傍人門不幾喪我玄沿河西復西
草草屋數椽唐儒杜先生向來此周旋食我西山英飲
我西澗泉吐出五色絲無愧三百篇遂令浣溪上草木
皆光鮮我欲於其間結茅近英躔尚論古之人永謝區
中緣鷦鷯翔蓬蒿庶幾避鷹鷗但欲一區宅不用二頃
田念昔懷此心只今已十年平生百事拙為計亦可憐
家有萬卷書而囊無一錢登臨每悵望興味徒拳拳珍

重金石交議論相磨研求尋鷗鷺盟擺脫薄書纏風月
為鼓吹溪聲為管絃茗飲間醴醪藜羹雜豆籩談諧各
自適灑落真神仙哦詩紀勝遊他年草堂編

步自玉局會飲于判院塗丈廨舍正得日字

肩輿訪藥市散步困兩膝行行初及門品第已不一細
閱廊宇下紛然莫窮詰席地堆雄附連盤佇參木雲乳
色晶熒沈檀氣芬苾溪毛極草莽水族包蟲蛭貴者如
丹砂賤者如乾漆苦者如膽礬甘者如石蜜陳者如脯

醯新者如棗栗來為中國用往往四夷出海賈冒風濤
蠻商經萃律厚利誘其前顛沛不遑恤小亦挾千鐸多
至金百鑑開張自寅卯收拾過酉戌富豪盛僮奴羸老
攜兒姪車馬浩駢填空然皆逆溢晚飲各酩酊歸裝滿
箱帙人生天地間稟賦陰陽質寒溫儻乖誤未免生衆
疾至人窮物性扶世方開術春冬別根苗南北辨枳橘
形色與氣味審訂皆具述庸夫肆胷腑妄以甲代乙贖
贖莫知誠十療宜十失念我奉慈親春秋垂八秩仰事

則欣欣退處常慄慄嘗聞仁者壽又聞惠迪吉版輿來
三年清健如一日平生讀醫書殆未通六七甘草真國
老鹽梅乃良弼儲蓄以待用選擒貴纖悉譬如天未雨
先已營居室所以身強健有若天陰隲正惟養生外萬
寶無所昵往年憶曾遊初亦無固必忽得九老圖如得
清廟瑟儀冠甚英偉真是舊名筆右太師潞公左司馬
君實彈碁以為戲一局良未畢君實思沈吟心志何專
一潞公隨所應氣貌加閒逸諸公各注視袖手觀彈擊

焚香與之對想像見真率攜持恐失墮固已藏之密重
來何所見追歎空唧唧他年玉局仙希蹤老蓬草

食筭

早筭自香美欲食不得嘗晚筭已惡臭頓頓充庖漿蔬
食苦不繼且復幾其良陋巷有佳人簞瓢不充腸其人
久已死至今有耿光所以天下士貧者惟其常得失固
了然是非何較量大烹幸列鼎嗟爾其勉強

籠雞

籠中畜一雞飲啄頗云足其雞渾不顧引頸欲逃出旁
雞大愛之貪食籠中食回旋欲歸籠不省籠拘束

欽定四庫全書

性善堂稿卷二

宋 度正 撰

七言古詩

貫之學士寵示佳作欵然有丘壑之思因反其
意以招之亦朋友相勉之義伏幸采贍

夫君隆隆如長車方途萬里無塵沙天公生材要有用
安得嘿吟窓紗辛勤學問求大指求不在他心而已
解將歲月作工夫定使枯株發春媚我家傳家詩與書

家徒四壁一錢無年來行李環天下直從南海薰香爐
先生曰來子可語以手手地傳心圖歸來日日鋤其惡
陶然一室皆真樂他年努力回羲皇更把天心驗圭角
今春大震電雨雹南峯無之黃夢得詩來有天
意因以旌遺逸之句正忍其輕忽灾異失聖人
迅雷風烈必變之意用其韻以解之

仲春戊申日之夕牛羊下來猶未畢迴風烈烈漲黃壤
陰雲衝衝蒙白日騰光初覺火燒空打屋乍疑天隕石

出門愁見荒山徑高卧徒驚墮四壁嘗聞正直天所祐
又聞豪橫天所疾盲風恠雨豈徒然顛倒橫縱未遑卹
老農慘怛心欲死羣蛙號呼興自逸那知殺菽困黔首

但指嘉禾歌赤鳥何人漫讀周官書更笑深山間小艇
廖良譽棹小舟載酒追別至故縣而還

馬鳴溪上想英概牛口莊頭訪故廬登場羅列萬石廩
揷架縱橫千卷書有懷西山古鳳鳥更看北壑今鯢魚
江水江花兩無盡後之來者應何如

送後溪先生龍門賦別

皇帝龍飛慶元元盡收者舊為羽翰誰生黨論中譁誼
一旦剪落堪悲酸謂曲為直忠為姦謂麟為虎鴟為鸞
朱劉章陳坐譏彈彭呂繼之何摧殘自從阿衡局九原
至今草木猶銜冤餘波滔天如驚湍一落其中無全安
五年天子御金鑾恭已南面朝衣冠有一新進當諫垣
前言劉某入祠官乞加竄逐風朝端天子曰噫子甘盤
鬚髮雪白心甚丹徙居房陵聖恩寬公心怡然無怨顏

秋風蕭蕭零露溥浮雲散開雨脚乾公今度棧車北轍
有客越境追征鞍天之降材良獨難達則致君窮立言
曩時夫子投杏壇刪詩定書傳淵騫春秋一字誅黃泉
萬世賊亂心膽寒子輿賦歸辭惠宣仁義七篇皆肺肝
伏羲六畫羲深玄文王明之當憂患降周迄孔世莫傳
東溪先生抽關鍵發揮絕學窮根源惜哉遺藁今未完
先生亂思案亂思二字疑有誤真奇觀庶幾後生窺成編君玉舊
學非終捐願言珍重勤加餐

送張義立制幹赴闕探韻得東字

皇家科目周家同三歲大比羅英雄六龍渡江念幽遠
賜之貢額令選充載戢干戈講經藝詩書比屋陶儒風
堂堂衛公千人傑振鬣長鳴萬馬空一時諸老皆斂避
束帶廊廟熙羣工地靈育秀殊未已有偉男子如衛公
龍門逸步已突兀鳳穴神彩尤昭融襟懷洒落志慷慨
風格俊爽材疏通源泉混混回倒海力量恢恢扶頽嵩
幾年名震動旒冕一日詔下來旌弓天之降材要有用

士之用世良無窮蕭曹事業皆土苴堯舜規摹宜磨礲
支持大厦要櫟棟努力自愛毋匆匆

送唐宗道制幹赴闕探韻得書字

妙年璧水充豐儲一日變化施長裾五色神彩丹鳳好
一襟和氣春風如東薄扶桑畧牛斗西遊陸海環坤輿
詔書奕奕九天下雲程冥冥一步初吾君選士作舟楫
豈特文館讎詩書曩時黨論既喧闊往往儒學遭驅除
鄙哉小夫自貽戚因循封植成癰疽祖宗在天實啓祐

忽然潰決今無餘雖然四體已清泰無奈元氣猶空虛
調和脈絡勿草草整頓罅漏當徐徐諮詢芻蕘下謗木
收名耆老來安車堂堂國勢儻前定蠢蠢強敵誰侮予
明時得意好展盡書生長慮元非疎母為袖手事緘嘿
願以正論開宸居豈惟民畝望芘賴亦有草澤思吹噓
江頭送客重感慨勉之行矣毋躊躇

送李君亮安撫赴闕

皇帝龍飛十四載拱手垂衣功不宰誰生厲增起甲冑

天下岌岌幾於殆赫然烹阿封即墨神機獨斷定四海
內醻勲庸清列位外名諸老仍博采自古聖人聞至治
不貴無過貴能改三池先生已先入諫閣經幃行遂拜
遂寧先生又繼起左手便當調鼎鼐冬官侍郎何遲遲
幾日涪江下寒瀨恭聞促詔已屢下雲漢昭回九天外
吾君寤寐在良弼其意豈不望啓乃往年袖手固其理
今日緘口庸何待祖宗至仁育疎戚常使無權免驕泰
宣仁聖烈重貶損功參堯舜光萬代當時若不甚快意

其奈無憂近菹醢前乎六一論堯佐後日了翁陳二蔡
一從一違事已判得失了然為世戒況今政事歸中書
國體堂堂方正大春宮仁孝且英睿多士盈庭復鵠鵠
先生而言言易入及其事至恐不逮姑置區區論商鑒
覆轍不遠那容再行看正道動前席盛時難逢願自愛

送蔡使趙伯川赴闕

三王垂世何煌煌詩書所稱周尤長雖云積累日源遠
其實本支由宗彊內環旦輿扶九陸外列毛原鎮四方

宣王中興恢大業復有虎臣如鷹揚卜年過厯前未有
邈哉夏商矧漢唐皇家揖遜古舜禹建宗作屏周成康
巍乎神廟有遺訓作而新之進厥良振振信厚皆麟趾
翩翩羽儀多鳳凰扶持天日豈易事往歲一段尤輝光
無何讒口亂白黑至欲疎遠空藩牆天相宗社迄感悟
重惟孤立當懲創有偉丈夫在遠外是嘗拒賊賊莫傷
淵洪胷次自磊磊慷慨顏貌真堂堂吾君想象日已久
急下詔書來取將旁招俊乂第一義理亂之機戒履霜

名世之卿夫豈少貴戚之卿人所望有懷器業得施用
感激為賦維城章

和黃侍郎韻

君不見君家涪翁居戎州只為山月來登樓又不見君
家繡衣老使君傳家文物如卿雲兩仙仙去今百載雲
冠霞佩儼如在數行妙墨留壁間九頂三峩屹相對竹
坡先生駐歸步來拜翁祠還少佇水光山色為改容收
拾奇觀入新著世間好景苦留人無奈催歸作霖雨山

谷先生心好客為愛橫空雪山白慙懃載酒清音亭一
抹雲間真絕色鴻飛天際去冥冥風入松間聽琴瑟浮
雲聚散兩茫茫大川東注何終極茲遊應不減風雩清
和正值春三月

壽制置吳侍郎

洙泗之根枯無芽千五百年復生花章通句解到聖處
格高調古意易差南嶽一登光萬丈下照百物窮幽遐
天公欲振斯文緒卓爾大雅生長沙淡如清廟有遺味

粹如白璧無纖瑕周旋禮樂今冠冕彈壓妖怪古鎭鋤
翹翔祕館育儀羽发業殿中峩觸邪忽驚雲霧蔽日月
一落湖海潛煙霞浮言既空望逾遠歛起仍乘使者車
急祇臨遣護襄漢旋奉溫詔來三巴春風所及自和氣
坐令四境還桑麻五月渡瀘臣敢憚晝日三接恩意加
皇心念爾蜀父老因以與爾母咨嗟但見田畝興孝悌
已無稂莠勞梳爬洋洋韶濩出正始一洗下俚之淫哇
夤緣未學被羅致得以文藝陪絳紗作興詩書盛樂育

謂之文翁寧非耶蜀人德公盛於衛思厚報之吟木瓜
二陽寢長今初度門無雜賓賓則嘉欲酌北斗薦眉壽
聽我祝辭人無譁先生直上作舟楫領袖夔契承勛華
心回元化位天地手挈魁柄扶邦家工師作室貴兼用
施置寧遺負與义自憐愚魯無所似獨於詩書涉津涯
有如使之執經侍或能誦說聖人汙古來好善優天下
珍重先生借齒牙

壽黃侍郎

玉井之泉其源深淵涵停蓄包千尋風行於上渺河漢
諸子淺陋其蹄涔茫無畔岸容鼈鼉富有磊落潛球琳
大原自出號學海餘波散及蕃儒林有如霖月當空照
羅列萬象中森森恭惟王明可用汲一勺沃我思賢心
推之四海澤焦槁元戎十乘來駿駿銅梁玉壘日澄淨
夜氣晨光煥井參區區賤子愚且魯非曰能之學鼓琴
慙慙三弄衆掩耳莞然一笑遭知音推琴而作喜欲舞
慨我得此踰兼金上方穆穆回元化捨爾其誰扶當今

傳聞丹詔九霄下
袞舄未至虛宸襟
請書國紀開皇極
雍容調燮陽與陰
願公自愛母久外
天下蒼生思作霖

壽寺丞唐文

維時皇輿駐吳門
三光五嶽之氣元未分
鍾而為木為杞梓
鍾而為玉為瑤琨
先生獨得之表裏何粹溫淵然
之學妙今古浩然之氣充乾坤
探月窟躡天根朝蟠木
夕崑崙超軼絕塵有如此餘子
瞠若誰追奔紛紛何所
知駭歎空云云君不見蔡家太師
倡紹述當時流毒并

雞豚魯國抱其學屹如中岳尊又不見秦家太師握和
議羣邪喻喻迷天倫紫微於是時橫身扶正論天公下
監世忠義界以斯道昌其孫胡不遊東觀胡不遊西崑
胡為尚婆娑萬里乘朱轓依然不磷缁炯炯超塵昏昔
堯登彭叟歷佐周與殷後來磻溪翁辛勤晚策勲況茲
才之難典刑諒誰存玉律回孟陬瑞氣如雲屯請賦嵩
高篇萬口同一言願公上玉堂願公登金門功成名遂
歸鄉枌賤子年年開金樽

壽外舅富順趙使君

天家積慶如江河千枝萬葉魯衛毛聲名赫赫照今古
骨相飄飄多俊髦惟安懿王邁種德當時廟社遺勲勞
本支百世端未艾綿綿爪瓞更崇高只今中興得旦奭
夾輔日月參夔皋自餘材德踵相望磊落抱負皆英豪
或持皮帛登臺省或奉符竹分旌旄金川丈人最後出
平生力學勤持操高談奧論不可到一灑萬字無停毫
聊將圭撮試當世已被天語加崇褒從此公道更開泰

未必奔走懸三刀念昔南宮陪俊翮偶附驥尾辭蓬蒿
因蒙顧盼被收錄得拜門下恩則叨自憐薄命薄如葉
十年再爾吟離騷世間情態已百轉每歎慈愛終堅牢
今逢佳節揆初度欲薦眉壽酬甄陶丈人丈人聽我語
我語憔悴空啾嚹白圭三復古亦少緇衣改為今可遭
人言愷悌必富貴愷悌富貴何由逃不願歸來一尊酒
但願努力登三鼈我欲執鞭追壺中之日月薦海上之

蟠桃

壽憲使大卿

自昔天之生大賢其間往往幾千年前日顏曾乃並世後來孫樂還齊肩參稽疏數未一概廢興大抵關諸天恭惟皇家受眷命五星集奎光芒懸復振斯文自洙泗渙然遺響聞伊瀍微言奧論揭日月九州四海俱流傳浩齋先生本自得聞風特起吾東川當時造入自孟子善養其氣氣浩然配合道義期充足至大而剛直以全後來豈不有繼者要之聞道先生先今夕何夕天氣好

虞琴初奏南薰絃正陽之月月幾望於時蓋得乾之乾
宜其秀質溫如玉不磷不縕白且堅吾君好學古未有
直上便可升經筵力闢淫邪開正道雍容堯舜陳王前
仰視蒼蒼豈無意如此大器堪扶顛諸生載酒來薦壽
山肴野蔌徒拳拳躋彼公堂喜拜舞正也請賦嵩高篇
壽黃運使

南海之中三神山高出天宇超人寰上有神仙百萬宅
瓊欄瑤楯相回還四方鱗鱗中傑觀不知誰氏當中間

或云黃帝之後已百世雲仍詭詭褒衣博帶千官班向
來山澤癯晦伏潛深灣是家老仙伯下顧目所瞇中夜
舞鸞鳳明朝排天闢自從放出一頭地長江大河聲潺
湲東皇回蹕鼓萬象和氣襲人春初頒雲裾霞珮來何
所巍峩步趨貌則閑生香馥郁浮四座得未曾有天非
慳至人之子飫芳味欲揭北斗高莫攀丹霄爭看來驛
騎袞衣直上承天顏上論唐虞開稷契下及草野兼庸
孱嗣德之繼發餘響未必政爾詩書刪

欽定四庫全書

性善堂稿卷三

宋 度正 撰

五言律詩

謁新漢州范文叔

歎息中興後斯文一髮如廢興天有命用捨道何疎太
史遺風在南翁絕學餘君王欲堯舜安得賦歸歟
來紓廣漢綏却近守雲居風月誰同會林泉樂有餘卑
詞老中允伊川在廣漢嘗為父太中公作書請中允君為學 分宅卜橫渠橫渠先生

有子孫流落廣漢者前丞相趙公帥蜀日買田居之今在焉後來端有望吾道竟何如

巴岳東峰下春陵別駕蹤陳編新德業陋質古心胷雅得千秋契那知並世逢樂哉開後覺乞我一中庸橫渠得范
文正中庸讀之而學始進

送別羅堅文

共席勝冠日分頭既壯年許身要到聖論德未能賢歲月於何駐工夫在力肩有言堪記憶隨處是耕佃

重違直諒友失入斗筲羣眇眇初晴日濛濛欲暮雲已
荒三徑菊無奈萬家薰莫厭山中惡山中妙莫云

奉輓近故制置侍郎畏齋先生吳公

人物雄三楚師傳自五峯求仁居廣大學道到從容世
仰堂堂表天知磊磊胷斯文真不幸海內失儒宗
訃音來嶽麓天下想遺忠金匱嘉言在清朝雅望空漢
庭悲賈傅蜀學祀文翁沒世名逾盛方知此道公

當年王事急盛夏歎馳驅振鐸宣皇化登車禮碩儒薛

公推一范張老得三蘇擾擾成何事千年美意俱

奉輓近故安撫侍郎龍學劉公

有開元祐相世世出英才堅正由天得高明自學來清
忠通聖鑑雅望應公台渭上明星落山山草木哀

學術原三代文章自兩京公朝推宿德近世號名卿楚
俗思羊祜陳人泣孔明平生知己淚今日為公傾

輓劉大監思恭

簪綏源流遠詩書氣味香啼鶯翔澗谷鳴鳳瑞朝陽壯

志欣辰告羸軀痛夕亡萬夫今失望擬欲問蒼蒼

一門金玉友仲也更高明天粹仁幾熱心融義亦精有懷殊未究所論畧施行握手悲無日臨風涕泗橫

奉輓友三舅知縣還山

衣冠推甲族詩禮自深長雅意如諸謝名章似晚唐亂流浮小艇繞屋種脩篁曾次渾如許行藏已兩忘

晚來為令尹此意亦云聊舉箋清風滿彈琴白日消精神元未瘁魂魄竟難招回首梅溪路傷心過畫橋

送輓監簿游子正詩

早年馳偉譽晚歲奮奇才奔走千官冗經綸萬慮開忠
謀扶日上切諫挽天回大厦方如許云何柱石摧

捐軀陳大義協力濟多艱賢相尋遷死明公亦放還俄
聞姦黨敗僅見聖恩頒已矣埋黃壤傷哉涕淚潛

哀射洪陳隱居

憶昔孔晨日孤忠貫日星川流平處靜山色本來青浩
浩何終極嗟嗟尚典型我思人不見極目涕雙零

哀通泉李僉判

豐基根也厚枝葉固其龐地域雲夢九天街石筍雙圭
璋沉下國桃李爛他邦寂寞涪江上聞風意已降

哀金堂張通判

豫章驚早世修節凜風林松栢山中友江湖物外心茂
陵多異賦梁甫又悲吟琢句藏深谷他年尚德音

徐夫人輓章

芬芳蘭蕙畹籩豆有司存抱燭丹心苦深居德性尊庭

前桑有附戶外竹生孫遺範章古新詩詔後昆

奉輓近故太夫人史氏二首

佩服詩書訓周旋禮義中春風三月永淑氣四時融當
戶能安節傳家務教忠真成滂也母百世仰高風

有子來為牧孜孜奉母慈涵濡千里潤雍睦一家推壽
考國人願循良聖主知詔書催令伯歎息想遺規

金堂塗恭甫奉其母夫人謝氏還山為賦輓詩

一章以送之

族姓源江左來歸禹外家懿文吟柳絮淑質詠桃華蘭
室雙芽秀萱堂隻影斜他年修郡志遺範照三巴

七言律詩

殿中覆考進士

宮漏傳籌趨絳幘御盤行炙出黃金春餘花氣香寧重
雨足林光綠更深通籍不須羞暮齒好文何幸獲初心
東風似借魚龍便一夜奔雷數振音

燕漕司進士小詩奉勉

奮迹山林志甚疎濫當春棘品賢書學開鄒魯人無異
文到卿雲士有餘力戰吝驕存廣大深培根本黜浮虛
此中幾許經綸地萬里先看一步初

暢伯圭父子下第歸鄉攜厚由廣文書并手佳
章寵貺正舊讀程門遺書知有潛道者列由求
之間今見伯圭父子姓名不勝驚喜因問家世
出處果潛道近族遂用其韻反其意出鄙語以
謝庶幾朋友相與切磋之義也

先正傳家遠泗濱一言一論本諸身是間極力窺真際
物外何心逐像人來詩有臨風流瞻大像之句 踏履若迷天所賦奔

馳猶誤實之賓都將出處東高閣明日從容儻細陳

去年微之國史讀易徹章夢謁晦翁相與從容
話言今年讀周官再用前韻錄以垂教正謹依

韻酬謝

伊人寤寐自求之鑽仰應無咫尺違試看後來身願學
孟子便如當日自歸依顏子 及門定許偕行止下筆何由謬

是非好把遺編還指示也教都識大音希

右和紀夢

禮經遺子略聞之

先君命正以周禮應舉

大法昭然世莫違初學

卑卑由禮立終身懇懃欲仁依芸苗自我持三勿克已
從頭絕四非往教舊盟如可踐警其懈惰久心希

右和讀周

官

臨川吳子達以揅著遊成都訪余寺中見堂上

晦翁像作而曰向亦嘗得見之且見問蜀之易

學子雲以來代有其人近世何如某歎其用意

精切拳拳如此因為出數語以勉之

千古義皇一片心何人此地口微吟鑿開未濟言無幾
說破先幾義極深此事舊傳師友記斯文今見火珠林
伊川于寺廊見治篤者得未濟男之窮三
陽皆失位之說晦翁謂正云此火珠林語成都自昔多
真隱著眼稠人更訪尋

南平教授勾子甲見訪於益昌自言正在華陽
時渠方待試石室屢過縣齋勾重慶人將至蒼
溪又訪舟中且以佳篇為贈次韻謝之二首

頃年應聘漫談經喜向寒窗訪聚螢撫字昨慚書下下

佩衿今羨領青青儻來富貴皆塵土無盡詩書自日星

珍重聖賢垂軌範不尤臧氏不尤邪時正蒙蜀帥薦上為鄉人役省者繳

論勾詩首述當時
事故末句及之

漢威西被浹燉煌已覺邊塵不復揚一別可堪論世事

異鄉聊共舉空觴

是日賀歲俱以勝酒止酒但舉杯而已

只愁山月嫌清

淡不怕江梅笑醉狂慣涉風波神不動流行坎止未須

荒

臨邛計次魏自言六世祖破荒先生晚居景陵
因葬焉後世子孫歲時不能拜掃日負樵牧不
禁之憂慨然欲往攜其所藏遺書一卷求書紙
尾且云是行并之武昌省運使表兄迤邐觀光
上國用正嚴字韻賦詩一章以言志正亦用嚴
字韻為賦三章以勉之云

如何袖手伏山巖頃刻猶能草百函曾次宏規標衆正
筆端勁氣磔羣謠行看雲漢翻鴻羽更喜秋風送馬銜

南國諸公共推轂從今不復厭卑凡

涵養工夫自野巖淹該萬卷一空函何須識者方能識
自是讒人不敢讒騏驥栖栖垂阜櫨駕駘擾擾被金銜
不妨希價咸陽市未必人人眼目凡

不及摶衣拜紫巖尚能什襲寶書函掃除荆棘扶初日
投畀烟嵐困老讒四海時無伸國論百年人自仰台銜
南軒衣鉢今何似見說諸孫也不凡

正家藏魏公父子書凡十六餘紙

奉謁夔州何異侍郎

浩蕩江南春更和幾回風月又婆娑夔門外戶千鈞重
灔澦中流一節高蜀國移花今日事上林種柳舊年窠
殘膏餘馥知何恨徙倚江臯揖晉波

制置侍郎閣學台座俯從鄉論營求勝地改建
貢闈嚴嚴翼翼實稱朝廷所以賓興賢能之意
父老觀者莫不稱歎今工已告成命客飲之正
獲與焉謹賦詩三章以紀盛事詞鄙意拙亦各
言志儻蒙采察曷勝榮幸

中興詔下九重天分建科場貢蜀賢急就佛宮嫌北面
載開儒館墮西偏得人自昔英才盛擇地於今氣象全
多士深思公雅意要收鴻碩副詳延

殿角西頭闢禮闈崢嶸棟宇更巍巍碧鸞金馬連環繞
雲頂峩眉聳翠圍陳閩州范成_蘇漳州_{張廣}應並駕龍期_昌

章荅

侍講郭_彙

四公皆隱士

亦橫飛

秦闕入帝畿

皇家科目釣英豪手大方能得巨鼈考論勲庸推虎榜

講求師友自鸞刀

嘉祐二年歐公主省得明道橫渠蘇氏兄弟曾氏兄弟是歲廷試鸞刀詩

泉翁老蘇竟被盲夫棄雲叟

張白雲

空勞聖主褒細看當年

權造化歐公眼目獨清高

上制置侍郎

龍虎西頭象更雄巍然坐覺馬羣空三千威已行方外
百萬兵元貯腹中蜀國歡聲連上國秋風和氣似春風
只今欲薦斯文壽大雅篇中願賦崧

堂堂漢使到天涯覆芘西南億萬家禮樂化行真有道

強梁氣憚自無譁坐觀狼狽奔牛角

近報金人遁入關中

敢復猖

狂犯虎牙措置得宜歸妙算更歌豐樂慶中華

武侯落落舊規摹千載誰能發壯圖撫定南方無後顧
感通北面自前孚但於號令教心服自是歡忻聽指呼
羣策不遺光竹帛方知儒術本非迂

上李大參

坐對江山古與稽熏爐一線入雲霓聞思草木憂春雨
轉念桑麻病夏畦有美行離泥不滓無言桃李下成蹊

青天瑩徹明如鑑下照毫釐自不迷

雲間龍鶴隱峯巒袖手何妨此考槃秋老未須愁菊悴
春回寧復訝梅酸風吹鴈字成簪盍雪壓鷗盟閱歲寒
萬卷皇墳誰可續為言執事勸加餐

上趙茶馬

仙源奕葉滿皇州人物於今第一流蹈履詩書宗孔孟
扶持日月繼伊周更觀河濱盤根出已自風雩向上求
異說掃除昌此道方來勲業掩前修

聖門絕學歎中微天祐斯文再發揮宗袞爰升陪國論
黨魁特起贊經闡麒麟復見公朝瑞虎兕何憂我道非
千載明良相慶會更歌既醉醉無歸一作可愛無如冬日好表年今日為

伊祁

上茶使趙伯川

六陽浩蕩奏薰風白雨肥梅纂纂紅學到狼胡心湛湛
性同麟趾步融融已鋤漢戚更王化行建周宗輔聖聰
師友一源端復振世間從此卜興隆慶元初余恭公當國晦翁首入經筵

幾年題筆決文圍妙手元堪補袞衣不許不諛持正大
能經能濟洞幾微天高且作茶星現地迥行親海月輝
萬歲池塘神興逸總教西子賦東歸

謁茶使

劖南劖北盡儀型妙墨題名入畫屏風卷渥洼來汗血
天開井絡得茶星照人一點應神會回首三年更眼青
雲外脩程橫九萬附渠飛翼上青冥

謁江州易彥章

經帷諫閣竟云何且著蓮花峯下磨書院淒涼安處問
廬山突兀為誰高依依松柏經年好泛泛鶴花逐日過
萬世清芬懸日月元來得失一毫毛

呈晏制幹二首

隴西公府俱名勝元獻曾孫號最賢王陸新題翻墨榜
金門舊事付青氈遠遊行橐詩千首退食高齋易一編
再世起家調鼎鼐中興榜樣更蟬聯

憶昔歸來自建溪徘徊擬峴訪前題江山秀偉鍾靈傑

文物光輝煥斗奎歷數儒紳真冀北推源宗派孕江西
鳳雛驥子今如許稱兕公堂儻許躋

奉呈制機

三弄薰風再入絃東堂珠履壓初筵紅蓮喜泛西來日
蓬矢欣逢北伐天一句緇衣真舊詠幾章綠竹更新箋
中興事業皆餘地何用模糊佛與仙

和制置喜雨之什

靈均一寸了纖埃坐看雲根萬仞開不用揮戈方掃去

等閒嘆酒便呼來清風濯我知何限霖雨思賢想幾回
更向日邊勤一溉盡蘇海宇亦奇哉

次合州新趙使君阻雨

時髦濟濟盛經綸自愧空疎忝字民槐下日光憂杲杲
麥秋雨勢厭頻頻化工付物難占命精意回天亦在人
閑閣焚香惟靜坐一回思念一眉顰

奉別運判劉公侍御十四丈

漢庭諸老盡忠良何事臺頭獨抗章萬里還家心似水

三年憂國鬢成霜盛時好去金毛鼠明主應思鐵面郎
聖世工夫須著力心中一點要明光

正伏承澤深僉判學士賢友以正生朝寵貺佳

篇輒次元韻

當年霽月正光凝坐對窗前草吐英已羨同時希潔白
遂寧傳者伯成事
從濂溪于合陽澤深亦遂寧人初到即重新濂溪祠宇而嚴事之云更髙異代繼澄清
即重新濂溪祠宇而嚴事之云蒲盧有道應知化花柳無私自應誠世重世輕皆
自樂登壇還與蒞斯盟

特立誰能為道謀千鈞豈可委庸流正塗壅底如叢棘
此意蕭條若綴旒指掌人歸容景慕傳心書在正研求
恭惟天道何由謬服力田疇自有秋

清獻重逢在永陽方知此道浸明昌非聰何以聞天籟
有畀終須辨國香不貳見知忠肅瓘逸民晚遇太師光
聖賢出處寧無意捨則深藏用束裝

自洛而閩幸有傳更相私淑百餘年面言猶及金為口

手墨何妨錦作箋

正嘗以所得晦翁書刻之石以示同志鄉人之在後省者謂錦標玉軸誇

示於人深
以為罪

在昔見聞迷卓約至今鑽仰歎高堅分明太
極圖中意更續源源付後賢

奉壽季章大參相公

卓立三峯萬仞高依然兄弟並雄褒卷懷經濟藏三徑
震起聲音滿九臯曾向黃扉參道論詎容綠野恣閒遨
紫雲山下梅偏早欲送清香薦玉醪

太孺人生朝

萬事隨緣處處安分明淡泊有餘歡癡兒解賦蟠桃頌

拙婦能炊脫粟餐天上神仙誰羨慕人間真樂我團樂
願如松柏堅剛壽相與年年保歲寒

賀張儀立弄璋

弄月吟風泮水湄幾回占喜悞蛛絲三鱣講罷爭傳易
一鯉祥開想學詩天傳梅花凝蝶粉春歸柳葉畫蛾眉
何時得踐凌雲約領畧山中一段奇

欽定四庫全書

集部

性善堂稿卷六

四至

詳校官庶吉士臣翁樹培

主事臣呂雲棟覆勘

謄錄貢生臣湯達泰

謄錄貢生臣郭墉

謄錄貢生臣王穀

欽定四庫全書

性善堂稿卷四

宋 度正 撰

七言律詩

別堅甫伯修

并序

堅甫伯修相挽道舊遂成濡滯今日梁使君宋別駕
又為置酒堅甫又欲更作一日留天欲雨風色頓寒
慨然念歸賦詩告別千萬矜亮

幾日馳來別浩齋偶然良晤盡吾儕竒留歸思主人惡

少駐征鞍客子佳栗烈侵膚凝臘雪縱橫塞路因山崖
三家白髮元相似故去從教慰母懷

送胡茶馬赴京西漕

夾岸黃花弄夕曛歸艎擊汰不堪聞愁容政想峩眉月
喜氣遙占峴首雲酒罷樓頭觀妙算公餘壠畔訪清汾
明年入奏明光殿前席雍容細剖分

送錢國博解成都漕節詳刑湖右

坐於黃卷得新功學海波中號老龍雅以明經空四海

何曾屈膝拜三公
漢庭耿耿千回夢
蜀道依依一節東
帷幄儻求真學士
當今難捨狀頭翁

難弟堂堂王立峯
當年同奏大明宮
早慚遊子迷求益
晚侍賓筵喜發蒙
妙境妄能窺鴈蕩
春風留得滿蠶叢
從今午夜占星斗
弱水之西望大逢

奉送游子正監簿解嘉定郡級赴利漕詩

中興人物爛如星
西海之濱起一經
皇極虛懷咨讜直
遠人却立望儀形
回天萬宇光衝斗
夾日一心夢繞庭

何草不黃風雨後更看老柏獨青青

君王神武念京都關洛規恢入廟謨渭水新屯觀定勢
木牛成算付真儒馳驅莫惜銷人髀矍鑠還堪發壯圖
會看詩書真事業摩挲劍石為平鋪

送曹機宜

溫公早歲侍天章萬里西來漕益昌講學於時資友鎮
溫公與蜀公為友定交當在此時
留題到處著男光利闇之留題皆然
春秋比較年相似詩禮漸摩日正長發策決科自餘事要須器

業踵前芳

送博寺丞

白日青天曉色開太虛澄澈絕纖埃三陽不與寒威盡
一氣還從暖律回更向中巖收桂子佇看上苑薦黃梅
幾多湖上閒風月舞詠應堪屬後來

送李左之制幹東歸探韻得今字

萬卷胷中貯古今西遊蜀道手捫參寶彙殘刻窺心畫
清廟遺音振學林雅行瓊瑰殊慰我每陪樽俎定論心

飄飄衣袂青雲去佇立東風聽惠音

送張季修歸簡州兼簡伯修

屈子文章似六經
縉雲重與振遺音
一門秀出金闕彥
三峽光搖玉宇參
挾冊夙潛心學海
揮毫今獨步儒林
橫飛脫去科場累
更去騷人向上尋

送許仁叔解組東歸

萬里來官蜀
錦城西南籍
籍飲清名
幕中議論誰為敵
天下交遊我與盟
聖處工夫須自得
明時事業只安行

草堂擬作終焉計便翼飛來總寄聲

送張西和南歸

公槃澗人
晦菴弟子

長記春風拂拂吹烏奴江上濯漣漪時在昌益便論槃叟心傳日更及南翁指授時戎貊也應知姓字親朋未必記芝眉公朝有意開皇極不用溪頭理釣絲

君錫知丞僚友錄示諸公所賦介壽堂詩謹次

後溪先生元韻以記盛事

老翁神氣亦輕強鑿井耕田種豫章扶植高標盤石壑

養成合抱棟明堂風雷海運非人力日月天開盛寵光
既醉詩書餐道德坐觀晚節更清香

至喜亭詩

扁舟三峽備艱難幸脫風波鬼未安山已陵夷成崎嶇
水無約束漸瀰漫半天堤柳垂春暖滿地江梅怯歲寒
坎坷一生何所用它年湖海一漁竿

題錦屏山

積翠浮空老不枯英靈今此定何如萬章松柏還蒙密

千載風雲頗濶疎一氣周流無間斷四時變化有盈虛
憑高極目懷嵩華此憤何時可一攄

奉送溫甫主簿赴昌元新任

年來昌合頗多儒滿目青山秀不枯隱者能通三聖易
賢良更續六經圖簿書整暇拋官事朋友從容味道腴
我已倦遊還舊隱新吟時寄幾篇無按永樂大典誤分作七言絕句二首

正今改

奉輓靈泉明府東叔學士

西州文物起雷霆四海一家仰聚星五鳳翹翔橫碧落
雙鳬朝謁墮青冥疑歸天上修仙史恥向人間駕說鈴
長歎良朋難再得更憂吾道太寥零

輓史教授子正

獨抱遺經手不停振衣藝苑自雷霆文如曾子反居亞

劉左史主省得其文甚愛之
楊訓質之以為第二人耳才過高軒又短齡共歎麒麟

麟封白壤喜看鴻鴈在青冥慈顏莫作虛空想西簡先

生千字銘

輓黃通判明叔座主

政在伾文過十年幾多巖穴老英賢公車牘上皆亨路
夜壑舟移闕下泉事業鼎彝千古恨文章衣鉢萬燈傳
先齋遺稿今無恙更看諸郎各兔旃

奉輓浦江譙夫人

魏華甫之母

天資高朗識精微千載興亡洞是非子美詩中聞鳳語

夫人好讀子美詩得其句法義之筆下相驚飛

夫人善書義之嘗學書於衛夫人口

傳諸子今為盛

夫人六子皆自授其書五子已登科一子前為濱帥

心念宗周古

亦稀夫人臨終有上下蒙蔽已甚吾不忍見亂之將及之歎

喜懼高懷如履薄西

瞻白鶴重歎

五言排律

知縣九十一文應聘成都賦詩為別

珍重圭璋彥經綸半世間紛紛徒自點默默了非頑懷
道心雖泰憂時鬢已斑操存期入室得失詎踰閑忽遇
風雲會應思雨露頌慨言全蜀病均是一家患友愛惟
天性侵牟可厚顏未能忘狗鼠安得及狐鯀昔志詞何

屈今行勢莫艱

公向論米麥估錢之害于運判劉德修又言于馮總領傳之皆不行

坎離

交接地損益覆翻間戶外元無盜山前怎有蠻都緣人

好事所以物生姦善惡無他道廉貪是要關但令歸似

水何用積如山問政文而上

翁論心武以還武侯未言齊

地利當念破天慳公議尤相傃愚言殆未刪君王何必

利益叟語非訛

七言絕句

殿中覆考進士

交戟重門間九閨彤庭紫殿切星辰能來此地連宵直
即是驂鸞駕鶴人

兼考遼寧補試鎖宿在學戲題一絕

壯士縛雞聊爾耳小兒相鼎竟何如眼前萬事不堪說
惟有秋風解得渠

贈震先生

眼如明月口如神閒裏乾坤物外身世上窮通都莫問
粹然生色幾何人

制幹判院初度載臨謹以梅起興賦三絕句為
斯文壽一笑幸甚

江梅吐出五花新綽約林間早占春多謝天公孕佳實
中心渾是那仁仁

冰魂玉質映霜林四月飛成點點金遙想清香能止渴
應知此意可為霖

傅巖人起應旁招道德光明相業高試問當年調鼎事
非梨非栗不能桃

正蒙主文教授大著寵示佳章輒繼嚴韻仰酬

盛意之辱兼呈諸契丈幸賜采贜正皇恐再拜

珍重知音審五聲也從紙上得張程設科久矣何曾見

想像雙瞳萬古驚

歐陽文忠公知舉學問則得明道橫渠文章則得蘇氏兄弟曾氏兄弟前

此未有也

眼空未可歎賢無瓦礫中間有寶珠多謝三義孕清淑
安排貢籍貢鴻儒

學禁初行好斷魂中庸大學委塵昏如今天子都除却

正學何憂更屈伸

外省風雷亦壯哉曾將科目放顏回

往時外省曾教授文作魁因尋

俊秀傳衣鉢笑指凌雲得得來

冥搜竊歎眼俱高我欲還家備百牢三十三人齊上去

舉盃帆外送洪濤

昨幸甚得見于玉教授丈得一論其說出於訂

頑克已銘詞致超絕輒借前韻以慶兼呈諸丈

幸乞一笑正再拜上

天作斯文鼓大聲 賢科今已定章程

劉祭酒嶧乞選祖宗盛時程文可矜

式者頒降近已得旨施行諸生自此升堂去讒說安能復震驚

廣文人物世間無兩眼晶熒照乘珠拈出便應人歎服

粹然議論到先儒

新泉淪茗濯詩魂繙闋如飛徹曉昏是石無瑕終是石
莫教抱璞退聲寃

鑒別毫釐豈易哉逢奇何惜讀千回充囊未可矜前得
如積薪焉看後來

淺陋微邦望不高偶同齊晉會蟲牢進賢受賞非吾事
拭目龍門躍巨濤

漕司檄勸稼望見資州憶王褒李鼎祚

文王既沒易中沒孔子重明漢又衰可惜李生真力學

但求象數不求詞

右李鼎祚

秦接衰周漢接秦漢儒議論儘真醇如何獨著賢臣頌

直使波流到聖臣

右王褒近世資人有著聖臣論誤秦檜者

益昌書懷

熙寧使者今何在

鮮于子駿熙寧中為益昌運使

元祐師臣去不歸

司馬

君實侍天章公為益昌運使題名烏奴寺壁

獨對江山舒望眼悠然天際見

雲飛

發益昌

牽江萬斛犯驚湍終日號呼寸寸難少駐不妨官避客
也教容易下前灘

奉送三榮王子文遊益昌

廉遜先生袖手間徽猷學士屢開藩行藏有道俱奇絕

誰似清名萃一門

自修盟好諱言兵競喜豐年賀太平養得狐狸解猖獗
健兒還勝老儒生

料得人人喜自新爾民元是漢人民君王仁對于天下
元帥慈祥也似春

徽學諸孫亦俊游舌端造化挽洪流慨然投筆從戎馬
要學班超萬里侯

命解

世謂藏倉解譖軻豈知天意在干戈如天使欲平天下縱百臧倉不奈何

訪廖叔度蒙示山谷所作真贊及藜郊等帖

珍重前賢此考槃山川環合地平寬雨餘草木俱蒼翠好與光風霽月看

過丹山訪黃元英不值英壬子歲正資州所解進士也

憶昔來司校士科宣傳是歲得人多重來處處歡相問

怪我官猶舊戶曹

訪舊所遊服膺齋悵然有懷

當年志氣儘豪英便把文章作六經堪笑從前大昏草
十年方見服膺人

小舟泝馬湖江

橫斜驟雨巾折角屈曲小舟屋打頭石壁愈高天愈遠
亂雲深處羈縻州

過石洞

修門赫赫鐵城長雨後山川擁翠光大似錦屏饒富貴
至令人說狀元坊

過方舟墓下

突兀方舟天下豪文如神禹決江河挽開岷峽歸伊洛
一點光明萬丈高

劍門詩

羅列峯巒萬仞尊橫縱畦畛自村村諸侯有道人安業
何用崎嶇閉劍門

夢得學士賢表惠寄蕨芽小詩馳謝聊發一粲
陟彼南峯採蕨芽筠籃馳送簇英華東君遊出非無意
救活飢腸幾萬家

偶成奉寄思中索酒

雨中風味似太苦夢裏秋懷如亂麻賴有郎君自軒豁
時攜一酌過西衙

欽定四庫全書

性善堂稿卷五

宋 度正 撰

表

重明節賀表

一千歲為秋祥啟篤生之旦億萬年上壽榮膺至養之
尊慶浹華夷歡騰宇宙臣某中賀恭惟皇帝陛下神心淵

默聖學高明本堯舜之相傳重光揖遜得文武之並處
益茂顯承安宗廟於泰山視天下如敝屣退藏於密獨

高清淨之風永孚於休必得熾昌之壽臣承流支郡幸
際昌辰匏繫一方莫進陪於鵠序嵩呼萬歲徒遐想於
龍樓

瑞慶節賀表

天祐下民瑞啟中興之聖帝出乎震光開陽月之祥交
騰動地之歡共作祈天之禱中賀恭惟皇帝陛下德邁禹
子學如湯孫寬仁有得於聖心孝敬日聞於天下聰明
睿智而不殺本一德以格天謳歌朝覲之交歸宜萬年

而閱世臣欽逢盛際假守偏城稱漢殿之一觴阻陪拜
手效封人之三祝徒切占詞

帝出平震上符乾道之亨嘉天作之君下應坤元之光
大施膏澤以甚久得懼心而允同臣正中賀臣聞膺祖宗

之託者其憂深受天人之歸者其任重必始終之惟一

斯中外以永寧周公陳王業艱難卜年遂過其厯成王
知天命不易享國克邁於前歷考先猷率由此道恭惟
皇帝陛下心危微而精一學緝熙而光明克儉克勤無

荒無急焦勞水旱而每為之慮函貸遐荒而不與之爭
與其放千百鱗介羽毛徒及於禽獸孰若保億萬生靈
性命允契於幽明一誠所通萬福來會臣少習孔孟長
遇唐虞已再被於麾符未一瞻於旒冕神馳魏闕夢繞
漢庭星拱北辰歎莫與風雲之會席上南斗幸終依日
月之光

謝磨勘表

不次之擢深懼罔功進律之廢游叨誤寵仰承明訓俯

竊震驚伏念臣才不逮人學惟為己出逢千載之休運
幸際三朝之眷知見義必為每勵事君之志知難不避
常懷報國之忠會強敵之外侵連叛臣而內應人情恤
惄物議紛紛遮蔽荆襄幸全國勢勞猝蜀漢載張皇維
所賴聖德旁加威靈遠暢祖宗孚祐天地降休雖屢蹈
於危機如安行於樂土重惟臣之何力敢貪天以為功
至於日月之微勞此乃臣子之常分豈圖鑒照特賜甄
升此蓋伏遇皇帝陛下達舜四聰馭周八柄循名責實

以風動於百王任賢去邪以日新於庶政致茲庸陋亦
在寵綏臣竊嘗自竭鄙誠妄陳愚計蓋以人心之失正
良由大義之不明若務包容便成姑息所冀少加於采
聽庶幾復振於綱常顧以髮膚上酬君父犯雷霆之怒
固知煩瀆之罪多戴雨露之恩惟念生成之德大

謝宣賜厯日表

承堯之運永膺火德之符行夏之時克正人統之紀事
謹有邦之舊時聞嗣歲之新順五氣之惟均協三農而

即序中
謝恭惟皇帝陛下體乾元而在御躬厯數以用中

先甲以令庶邦載凝不績後天而行萬化茂贊元功時
和歲豐家給人足臣淳膺申命首被賜書教授人時敢
不恪遵於聖訓欽崇天道庶幾近底於歲功

懷安到任謝表

千祿養親久塵仕版分符作牧驟玷侯邦仰戴皇慈俯
宣聖化力小任重感極涕零伏念臣既忝科名退求學
問考伊洛求仁之指要靡不研精慕東南名世之師儒

深思質問會權臣將除其善類取學術先加以惡名庠序禁而不言科舉棄而不錄後生小子靡然從之大學中庸幾乎廢矣臣寧身之厄誓志不回奮然為雲谷之遊直欲適風雪之樂往返萬里夷險一心遂得收放心一言以歸乃知不遠復三字之訓然以私淑諸已非敢求多於人自安賤微未嘗表暴遭逢仁聖奮發威權既得股肱之良遂去腹心之疾載恢儒術序正人才偶連帥之薦聞竟邇言之橫及但知快其私忿遂併毀其平

生謂其問道於偽學禁錮之時乃是要名於正論復興之後窮無所告退而自憐知之者莫為一言聞之者徒為三嘆自分遠方之末學甘為聖世之棄人幸公道之旁開徐浮言之自定復安乃職不失厥官夤緣序遷終被錄用此蓋伏遇皇帝陛下天臨萬務日鑒四方睿謨洪濟於中興神斷獨收於上策仁期遠舉道不遐遺察臣起自草茅自是素諳於民事憐臣老於州縣必能共舉於邦條擢之稠人付以一壘臣敢不激昂壯志潔雪

初心於簿書期會之中存愷弟中和之意省刑罰薄稅
斂庶幾曲盡於撫摩說禮樂崇詩書或可仰當於驅策
夢馳丹闕目想清光

重慶到任謝表

試藝祖開蜀之新郡昨嘗效於驅馳奉光宗潛龍之舊
謝中藩今復蒙於任使佩訓詞之溫厚顧謙薄以凌兢臣正
伏念臣少篤志於詩書早奮身於科第每於簿書之
暇力探問學之源議論不為空言誠欲明當世之務是

非考之至理亦嘗先天下而憂慕因便民之章首及防
微之策其近者欲修築城郭以制東西川不測之變其
遠者欲經理民兵以備南北軍不足之權又欲選將以
減冗兵練兵以省濫費凡此數事曾未二年叛兵或起
於邊州遺毒遂流於內郡竟勞廟算僅弭妖氛厥初或
謂其妄言至是稍稱其先見顧茲事任之愈重必曰保
安之是圖覽觀山川訪問父老控益梓利之要會曾形
勢之非輕導江漢汭以朝宗亦襟唯之所繫山澤間有

嘯聚閭閻即無蓋藏况軍旅之方興諒師帥之匪易必
得顏平原之風節乃能屏蔽於上流自非陽道州之仁
賢未易墮闢於下土夫何庸陋乃被選掄此蓋伏遇皇
帝陛下躬堯文明性禹勤儉登崇俊良以求民瘼默退
刻薄以迓天休一日萬幾聖意每形於憂懼九州四海
皇慈常切於焦勞故凡承流宣化撫宇之官必取學道
愛人愷悌之士重念臣親傳至學雅意本朝未能一望
於清光實已再叨於寵擢敢不究懷惠養悉力對揚上

推惻隱之仁下被瘡痍之俗羣后之逮在下庶幾堯舜
宅牧之心三年可使足民妄意由求為邦之事

代吳侍郎謝到任表

諭旨三邊甫竣使事提封四路復玷上恩更叨進職之
榮莫遂循牆之避祇服訓詰延見吏民惟全蜀實控上
流在今日最為重地內臨秦雍之壤外撫西南之夷久
已承平安於無事人習苟且吏多因循閑暇之時軍民
之務固已俱敝師旅之後公私之積為之一空瘡痍方

深悽愴未已念此百廢欲其一新譬如羸弱之病人要在充養於元氣諒非內修之已至何得外患之自消幸今小康宜思大計方圖登對悉具開陳庶幾四境之戚休盡徹九重之聞見豈期近軫於宸眷復茲就畀於使華未離所部之封旋拜重申之命自惟衰晚曷稱使令此蓋伏遇皇帝陛下聖學高明睿智深遠知臣馳驅之甚久必能洞識於人情念臣更歷之頗多或可修明於故事特加寵任未忍棄捐臣敢不精白一心匪勉千慮

勸農桑以固邦本興學校以正人心寬賦役以蘇疲氓
表廉隅以激貪吏急政要務次第講求精思力行期於
補報條奏利害仰惟聖鑒之主張宣布恩威庶竭愚臣
之鴦鈍

牋

上皇后牋

問寢龍樓方慶垂休之遠貽謀燕翼幸瞻遺範之存日
月云徂霜露且降凡在照臨之下孰無悲慕之思恭以

憲聖慈烈皇后以聖明之資相助高廟以慈愛之道啓
佑孝宗太上無為式資於明訓曾孫出震祇若於天心
功在四朝德垂萬世而謙沖退託寬厚慈祥曾無倖恩
之私少累清明之政俄驚仙駄忽棄人寰恭惟皇后履
行溫柔秉心恭儉初嫡外邸陰禮具修正位中宮坤元
允協迨茲追遠之際克篤無疆之思天道且周聖指有
敘願寬顧慮少釋憂勞上慰兩宮拳拳之心下答四海
顥顥之望庶幾安謐永底康寧

慰皇后牋

太子
薨

入奉坤儀方勤至養淳升震位遽用永違既進德以及時何降年之不永宗祊所系海寓共悲

中
慰

臣聞處常不

難而處變為尤難善始則易而善成則匪易處變而不

忘根本之慮善成而惟先社稷之圖雖悼前勞終徼後

福恭惟皇后殿下學通墳典識究古今德媲母周道能

子舜如慈聖光獻之贊仁祖早定策於英皇若憲聖慈

烈之輔高宗卒貽謀於孝廟載維國本以對天心內解

聖人之憂外慰蒼生之望

狀

進奉銀絹狀

方物之貢以其有不以其無臣子之恭貴於誠不貴於物爰尊慶典用謹邦常上件銀絹或本於山澤之藏或出於農桑之業舉之為宗廟尊罍之器德容可鎮於四方推以賞邊疆將帥之臣勇氣自增於萬倍

進金鐵狀

伏以六府孔修方仰聖明之治五材並用各輸臣庶之
恭前件金鐵文可以飾尊罍武可以嚴兵甲歸於天府
庸上備於寶藏播之大鈞或可資於器使

進上皇太子文集狀

伏以吾君之子謳歌獄訟之交歸古聖之書道德性命
之所寓敢以私門之傳授仰充資善之討論上件明道
先生易傳晚出其家未行於世蓋聖代不刊之典實人
間未見之書上蔡先生論語解論議精深識見超邁惟

其紹續於絕學故能啓覺於後人念上哲雖自於生知
然至道實從於心造願采涓塵之毫末以增海藏之高
深萬里瞻依一誠勤懇

權夔憲舉晏亞夫遺逸奏狀

照會嘉定十四年十月初四日到司明堂大禮赦文內
一項應士人有節行才識學術素為鄉里推重不求聞
達者委監司帥臣周加搜訪每路一二人仍與本州長
吏具從來所為事實所通學術連銜結狀保明聞奏不

得以常才備數委三省再加察訪如所舉不妄特與擢用當職尋具奏曰臣聞論語舉逸民天下之民歸心焉國家三歲一講大禮每以舉遺逸為先務累朝所得遺逸多所補益載在國史以為美談其後有司第存其目州縣不復留意搜訪豈真無遺賢哉蓋失於因循矣今皇子新立必將搜羅岩穴博選經明行修淹貫聖賢之學者以充贊講專一輔導臣用敢恪意訪察以應明詔伏見涪州布衣晏淵性資沈靜履行清修深明經學頗

通世務少從故禮部侍郎李熹遊熹愛其志中年又往建寧從故侍讀朱熹熹亦愛之留之門使與諸孫校書熹之門人衆矣惟淵從之為最久聞其言為最詳記其說為最備故其得之為最精今建陽書坊所刊朱熹經說淵之所錄易說實居其首故江東提舉李道傳所集朱熹語錄淵之所錄亦附載其中淵自通材非不求仕蓋嘗應舉於鄉適遭擢臣以朱熹之學為偽而抑絕之故雖文理優長而有司不敢取及朝廷清明崇尚其學

而淵已衰老不復從事於科舉矣今朝廷登進羣才不
間踈賤如淵所蘊未易多得乃獨使老於岩穴無所施
用竊為明時惜之伏望聖慈詳今來所陳爰淵本末特
賜指揮召至朝廷察其所學如所言謬妄敢逃譴責如
其所舉委有可采乞量加錄用以慰四方遺逸以為踐
修於幽隱者之勸

黃貼

臣生長川蜀自幼頗留意學問

故川蜀之篤於學問者臣皆得而知之西川則家樵李
心傳東川則有蘇振文皆晦迹丘園著書自樂竊慮州

縣不能具宣朝廷德意失於采訪臣今僭率併及之

黃又貼

臣竊觀祖宗之時待遺逸之士固有等級其上則

不次擢用其次則處之太學又其次則處之州縣之職

蓋係其人材行何如遺逸之目亦有名而不至者有既
至不願仕者亦係其人志尚何如大抵收名遺逸自是
盛時美事凡有薦舉者願朝廷特為施行初不患來者

之多又不患無以處之也

黃又貼

臣伏見自邇年以來

財用困乏理財用之官往往以羨餘為獻竊以為共濟

艱難尤須人才故請以遺逸為獻

